



Äntwert vum Här Inneminister, Léon Gloden, op d'parlamentaresch Fro n°539 vum 26. März 2024 vum honorabelen Deputéierte Marc Goergen

Fro 1 :

Gemäss dem Artikel 13, Alinéa 1 vum ofgeännerte Gemengegesetz vum 13. Dezember 1988 muss dem Gemengeconseiller d'Convocatioun schrëftlech op d'Adress vu sengem Wunnsëtz geschéckt ginn, dëst op d'mannst 5 Deeg virun der Sitzung. D'Gemengegesetz gesäit deemno vir, datt d'Convocatioun schrëftlech gemaach gëtt an op säi Wunnsëtz muss geschéckt ginn. D'Gemengegesetz iwwerléisst dem Schäfferot de Choix, wéi d'Convocatioun zougestallt gëtt.

D'Gemengegesetz gesäit weder vir, datt d'Convocatioun dem Conseiller per E-Mail zougestallt ka ginn, nach datt dem Conseiller d'Convocatioun iwwert de Wee vun engem ageschriwwene Brëif muss zougestallt ginn.

Eng elektronesch Zoustellung iwwer Mail vun der Convocatioun riskéiert awer contraire zum 1. Alinéa vum Artikel 13 vum Gemengegesetz ze sinn, wëll d'Konditioun vum „à domicile“ an dësem Fall net ka garantéiert ginn.

Fir dem Verschécke vun de Convocatiounen iwwert de Wee vun enger einfacher Mail eng rechtlech Basis ze ginn, sinn Dispositiounen am Projet de loi n°8218 virgesinn, notamment datt de Conseiller d'Convocatioun entweder schrëftlech op säin Domicile zougestallt kritt, oder datt hien d'Convocatioun iwwert de Wee vum Courrier électronique geschéckt kritt.

Fro 2 :

Wéi et am Artikel 12 vum ofgeännerte Gemengegesetz virgesinn ass, convoquéiert de Schäfferot de Gemengerot, ausser et handelt sech ëm eng Urgence. D'Aart a Weis, wéi dës Zoustellung gemaach gëtt, ass dem Schäfferot iwwerlooss, sous réserve datt d'Konditiounen, esou wéi se am Artikel 13 virgesi sinn, respektéiert ginn.

D'Convocatioun kann deemno iwwert de Postwee verschéckt ginn, oder, wéi et meeschtens de Fall ass, gëtt d'Convocatioun vun engem Mataarbechter vun der Gemeng dem Conseiller heem gedroen. Fir datt de Schäfferot eng Preuve huet, datt de Conseiller seng Convocatioun kritt huet, ass et normalerweis esou, datt de Mataarbechter vun der Gemeng sech vum Conseiller bescheinege léisst, datt hien d'Convocatioun zougestallt krut.

¹ Article 13, alinéa 2 de la loi communale modifiée du 13 décembre 1988 : « *Aucun objet étranger à l'ordre du jour ne peut être mis en discussion, sauf dans les cas d'urgence. L'urgence est déclarée par la majorité des membres présents. Leurs noms sont inscrits au procès-verbal.* »



Fro 3 :

Laut Artikel 13, Alinéa 2 vum uewegenannte Gesetz, ass et während enger Sitzung net méi erlaabt, e Punkt op den Ordre du jour bäizesetzen, ausser et handelt sech em eng Urgence¹.

Gemäss Artikel 13, Alinéa 3 vum ofgeännerte Gemengegesetz kann all Conseiller froe, fir e Punkt op den Ordre du jour vum Gemengerot bäigesat ze kréien².

Wat d'Question préalable ugeet, esou ass déi net als néie Punkt ze consideréieren, mee als Fro zu engem Punkt, deen um Ordre du jour vum Gemengerot steet.

Fro 4 :

D'Gemengegesetz gesäit am 1. Alinéa vum Artikel 13 vir, datt d'Convocatioun mam Ordre du jour vun de Gemengerotssitzungen « *par voie d'affiches apposées dans la commune de la manière usuelle ainsi que sur le site Internet de la commune* » publizéiert gëtt.

De Fall gesat, et handelt sech net em eng Urgence an den Ordre du jour gëtt op Basis vum Artikel 13, Alinéa 3 vum Gemengegesetz geännert, well e Conseiller gären e Punkt op den Ordre du jour bäigesat hätt, gëtt de modifizéierten Ordre du jour an der Gemeng affichéiert a kann zousätzlech um Internet-Site vun der Gemeng publizéiert ginn.

Am Fall vun enger Urgence stellt sech d'Fro vun der Publikatioun vum Changement vum Ordre du jour net, wëll d'Urgence just „séance tenante“ festgestallt ka ginn, an deemno keng Publikatioun méi méiglech ass.

Well eng „Question préalable“ och just an enger Sitzung ka gestallt ginn, ass och hei eng Publikatioun net méiglech.

Lëtzebuerg, den 19. Abrëll 2024
Den Inneminister
(s.) Léon Gloden

² Article 13, alinéa 3 de la loi communale modifiée du 13 décembre 1988 : « *Tout objet d'intérêt communal qu'un membre du conseil communal demande au bourgmestre de faire figurer à l'ordre du jour du conseil doit y être porté par le collège des bourgmestre et échevins, pour autant que la demande motivée a été faite par écrit et trois jours au moins avant la date de la réunion du conseil.* »